



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726-444; 726-400
fax. +387 33 726-423
e – mail: info@voda.ba

Broj: **UP-1/21-3-40-462-3/25**

Datum: **02.02.2026. godine**

«Agencija za vodno područje rijeke Save» Sarajevo rješavajući po zahtjevu pravnog lica «ALBA ZENICA» d.o.o. Zenica za donošenje rješenja o vodnoj dozvoli za ispuštanje tehnoloških i oborinskih onečišćenih otpadnih voda u prirodni recipijent sa lokaliteta kompleksa Uprave sa pretovarnom stanicom i pratećim objektima u naselju Raspotočje, grad Zenica, na osnovu člana 109. stav (1) tačka 2. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 48/99 i 61/22), donosi

R J E Š E N J E **o vodnoj dozvoli**

1. Daje se vodna dozvola pravnom licu, «ALBA ZENICA» d.o.o. Zenica, za ispuštanje tehnoloških i oborinskih onečišćenih otpadnih voda u prirodni recipijent sa lokaliteta kompleksa Uprave sa pretovarnom stanicom i pratećim objektima (interna benzinska pumpa, plato za pranje vozila za transport otpada, radionica za održavanje vozila i sl) izgrađenog u naselju Raspotočje na zemljištu označenom kao k.č. broj 387/4 i 387/5 K.O. Raspotočje, grad Zenica.
2. Vodna dozvola se daje na osnovu dostavljene dokumentacije, utvrđenog činjeničnog stanja tokom uviđaja izvršenog na lokaciji predmetnog objekta i uz sljedeće uslove:
 - 2.1. Da se upotreba i korištenje predmetnog kompleksa objekata vrši u skladu sa njegovom prirodom i namjenom te u skladu sa dostavljenom dokumentacijom i uslovima iz ove vodne dozvole.
 - 2.2. Da se, za vrijeme trajanja ove dozvole, obezbjeđuje da se tehnološke otpadne vode nastale pranjem vozila za transport otpada, održavanjem i čišćenjem radnih površina pretovarne stanice i radionice zajedno sa onečišćenim oborinskim vodama sa platoa interne benzinske pumpe, saobraćajnih i manipulativnih površina predmetnog lokaliteta nesmetano prikupljaju sistemom slivnih rešetki i kanalizacione mreže te odvođe do objekata za tretman otpadnih voda (separatori ulja i masti) a zatim ovako tretirane vode ispuštaju u kolektor oborinske kanalizacije sa krajnjim ispustom u rijeku Bosnu.
 - 2.3. Prečišćene otpadne vode prije ispuštanja u recipijent – rijeku Bosnu moraju ostati u maksimalno dopuštenim granicama definisanim članom 14. i članom 15. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20, 96/20 i 1/24).
 - 2.4. Da se objekti koji se koriste u svrhu prikupljanja, odvodnje i tretmana tehnoloških i oborinskih onečišćenih otpadnih voda nastalih u krugu kompleksa (slivničke rešetke, separatori ulja i masti, kanalizaciona mreža) održavaju i koriste na takav način koji će obezbijediti njihovu potpunu ispravnost i funkcionalnost. O načinu i vremenu radova održavanja neophodno je voditi službenu evidenciju i arhivu.
 - 2.5. Da se skladištenje nafte i naftnih derivata vrši u nadzemnom, čeličnom rezervoaru ukupne zapremine 20 m³ smještenom u betonsku vodonepropusnu tankvanu.
 - 2.6. Da se zaštitna tankvana oko rezervoara (kao i sam rezervoar) redovno kontroliše na vodonepropusnost tj da se vrši periodično ispitivanje te poduzimaju odgovarajuće mjere u cilju sprječavanja akcidentnih zagađenja usljed eventualnog curenja iz rezervoara ili tankvane.
 - 2.7. Skladištenje i pretakanje nafte i naftnih derivata kao i ispitivanje ispravnosti i propusnosti rezervoara za skladištenje goriva vršiti u skladu sa Zakonom o naftnim derivatima u Federaciji Bosne i Hercegovine (Službene novine Federacije BiH br. 52/14) i propisima iz ove oblasti, a na način da se spriječe dospijevanje nafte i naftnih derivata u podzemne i površinske vode.
 - 2.8. Osigurati priručna sredstva za brzu intervenciju u slučaju nekontrolisanog istjecanja nafte i naftnih derivata, kako bi se spriječilo moguće onečišćenje voda i tla (piljevina, prikladni absorbensi, odgovarajuće posude, uređaji za pretakanje i sl.).
 - 2.9. Talog iz separatora, kao i ostali opasni i neopasni otpad, se ne smije ni privremeno odlagati na česticu «vodno dobro», odnosno u vodotoke i na njegove obale.

- 2.10. Čišćenje i održavanje separatora ulja i masti te skladištenje i konačno zbrinjavanje opasnog otpada može vršiti isključivo firma ovlaštena za tu vrstu djelatnosti, prema posebnom ugovoru. Korisnik je obavezan da redovno vodi dnevnik o pražnjenju i odvozu mulja/taloga iz separatora ulja kao i preuzimanje drugog opasnog otpada.
- 2.11. Vlasnik odnosno korisnik predmetnog kompleksa je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz okna za monitoring prije ispusta u recipijent u skladu sa Uredbom o uslovima ispuštanja otpadnih voda u okoliš i sisteme javne kanalizacije. Učestalost i način ispitivanja vršiti u skladu sa članom 20. Uredbe o uslovima ispuštanja otpadnih voda u okoliš i sisteme javne kanalizacije. Rezultate analiza dostaviti ovoj Agenciji. Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlasti («Službene novine Federacije BiH», broj 14/10, 14/13, 26/14, 23/17 i 41/20).
- 2.12. Da se u skladu sa propisima iz oblasti zaštite okoliša, vrši bezbjedno i redovno skupljanje čvrstog opasnog i neopasnog otpada sa kompletnog kruga kompleksa, isti propisno skladišti do njegovog konačnog zbrinjavanja od strane ovlaštene organizacije.
- 2.13. Vlasnik odnosno korisnik kompleksa je obavezan pridržavati se svih mjera i uslova propisanih u saglasnostima i dozvolama izdatim od strane drugih nadležnih organa, a odnose se na korištenje i zaštitu voda i nisu u suprotnosti sa uslovima iz ove vodne dozvole.
3. Vlasnik, odnosno korisnik kompleksa je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada («Službene novine Federacije BiH», broj 92/07, 46/09, 79/11, 88/12 i 03/16), Prilog 1. Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
4. U periodu važenja ove dozvole, Korisnik je dužan provoditi sve mjere i aktivnosti propisane istom.
5. U slučaju izvanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, korisnik predmetnog kompleksa obavezan je izvijestiti nadležne organe i izvršiti izvanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.
6. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na predmetnom kompleksu obuhvaćenom ovom vodnom dozvolom, korisnik zaštitnih vodnih objekata nije odgovoran za nastale štete.
7. Ukoliko radom predmetnog pogona dođe do šteta ma kakvog karaktera, korisnik vodne dozvole je dužan uzroke nastalih šteta otkloniti, a nastale štete trećim licima nadoknaditi.
8. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
9. U ovoj upravnoj stvari plaćene su sve upravne pristojbe.
10. Ova vodna dozvola, shodno članu 117. stav (1) i 129. Zakona o vodama se daje s rokom važenja od 5 (pet) godina od dana pravosnažnosti ovog rješenja.
11. Prije isteka važnosti ove dozvole Korisnik je dužan da podnese zahtjev za izdavanje nove vodne dozvole.
12. Ovo rješenje o vodnoj dozvoli može se izmijeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

O b r a z l o ž e n j e

Pravno lice, «ALBA ZENICA» d.o.o. Zenica svojim zahtjevom, zaprimljenim u Agenciju dana 29.10.2025. godine zatražilo je izdavanje vodne dozvole za ispuštanje tehnoloških i oborinskih onečišćenih otpadnih voda u prirodni recipijent sa lokaliteta kompleksa Uprave sa pretovarnom stanicom i pratećim objektima (interna benzinska pumpa, plato za pranje vozila za transport otpada, radionica za održavanje vozila i sl) izgrađenog u naselju Raspotočje na zemljištu označenom kao k.č. broj 387/4 i 387/5 K.O. Raspotočje, grad Zenica. U provedenom postupku dostavljena je i pregledana sljedeća dokumentacija:

- Ovjerena kopija Aktuelnog izvoda iz sudskog registra broj: 043-0-RegZ-25-003217 izdatog dana 15.10.2025. godine od strane Općinskog suda u Zenici,

- Ovjereni kopija Uvjerenja o registraciji/upisu u Jedinstveni registar obveznika indirektnih poreza broj: 04/1-17-1-UPJR/1-4473-2/16 izdatog dana 19.07.2016. godine od strane Uprave za indirektno oporezivanje Banja Luka,
- Ovjereni kopija Uvjerenja o poreznoj registraciji izdatog dana 28.07.2025. godine od strane Porezne uprave Federacije BiH – Kantonalni porezni ured Zenica,
- Punomoć zastupnika podnosioca zahtjeva broj: 01-1421/25 od 28.10.2025. godine,
- Kopija Rješenja o obnovljenoj okolišnoj dozvoli broj: UPI-05/2-23-11-155/17 izdatog dana 25.10.2017. godine od strane Federalnog ministarstva okoliša i turizma,
- Kopija Obavijesti broj: 05/2-19-5-468/22 dostavljenog dana 02.09.2022. godine od strane Federalnog ministarstva okoliša i turizma (objekat ne podliježe obavezi pribavljanja okolinske dozvole),
- Kopija Informacije broj: 12-23-11200/22 dostavljene dana 10.11.2022. godine od strane Ministarstva za prostorno uređenje, promet i komunikacije i zaštitu okoline Zeničko-dobojskog kantona (objekat ne podliježe obavezi pribavljanja okolinske dozvole),
- Kopija rješenja o urbanističkoj saglasnosti za lociranje nadzemnog spremnika za dizel gorivo za internu upotrebu broj: 06-23-3358/16 izdatog dana 10.10.2016. godine od strane Službe za prostorno uređenje Grad Zenica,
- Kopija rješenja o odobrenju za građenje nadzemnog spremnika za dizel gorivo za internu upotrebu broj: 06-23-4700/16 izdatog dana 13.03.2017. godine od strane Službe za prostorno uređenje Grad Zenica,
- Kopija rješenja o upotrebi izgrađenog nadzemnog spremnika za dizel gorivo za internu upotrebu broj: 03-23-3580/17 izdatog dana 25.04.2018. godine od strane Službe za urbanizam, imovinsko-pravne, geodetske poslove i katastar nekretnina Grad Zenica,
- Glavni projekat: Vanjsko uređenje uz objekat «ALBA» u Zenici urađen od strane «Izgradnja inženjering» d.d. Zenica broj:15/2000 - na uvid,
- Glavni projekat: Vodovod i kanalizacija, elektro instalacije i centralno grijanje za upravnu zgradu sa garderobama i kupatilo za objekat «ALBA» u Zenici urađen od strane «Izgradnja inženjering» d.d. Zenica, juni 1999. godine - na uvid,
- Projekat izvedenog stanja za havarijalno korito i nadstrešnicu Investitora «ALBA» d.o.o. Zenica urađen od strane «DOMUS design» d.o.o. Zenica (šifra: 01-12/17, decembar 2017. god) – na uvid,
- Kopija Ugovora o čišćenju separatora broj:1925/23-DS zaključenog dana 12.12.2023. godine između «Delta Petrol» d.o.o. Kakanj i «ALBA ZENICA» d.o.o. Zenica,
- Kopija Radnog zapisnika o čišćenju separatora broj: 16-03/25 od 27.03.2025. godine i broj: 05-01/26 od 29.01.2026. godine,
- Kopija Rješenja o dozvoli za upravljanje otpadnom i njegovo zbrinjavanje broj: 12-19-10717/23 izdatog dana 13.05.2024. godine od strane Ministarstva za prostorno uređenje, promet i komunikacije i zaštitu okoline Zeničko-dobojskog kantona,
- Dokaz o uplaćenju upravnoj taksi na zahtjev.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u ovoj upravnoj stvari.

U skladu sa članom 12. stav (5) i (6) Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj: 31/15, 55/19, 41/20 i 63/22), izvršen je obilazak predmetnog kompleksa Uprave sa pretovarnom stanicom i pratećim objektima u ul Sarajevska bb, naselje Raspotočje u Zenici i tom prilikom je sačinjen Zapisnik o uviđaju broj: UP-1/21-3-40-462-2/25 od 29.01.2026. godine.

Na osnovu dostavljene dokumentacije i izvršenog uviđaja na licu mjesta utvrđeno je sljedeće:

U sklopu predmetnog kompleksa lociranog u poslovno-industrijskoj zoni u naselju Raspotočje, grad Zenica izgrađeni su sljedeći objekti: zgrada uprave preduzeća, hala za pretovar komunalnog otpada, nadstrešnica za skladištenje materijala za potrebe zimske službe, radionica za održavanje vozila i opreme sa skladištem rezervnih dijelova, kolska vaga, nadzemni rezervoar za gorivo kapaciteta 20 m³ sa aparatom za točenje (za internu upotrebu), manipulativne i parking površine, plato za pranje vozila za transport otpada, portirnica, separatori ulja i masti. Snabdijevanje vodom za sanitarne potrebe uposlenih je obezbijedeno priključkom na gradski vodovodni sistem.

Tehnološke otpadne vode nastale pranjem vozila za transport otpada, održavanjem i čišćenjem radnih površina pretovarne stanice i radionice za održavanje vozila se prikupljaju sistem slivnih rešetki i kanalizacione mreže i odvođe na tretman u separator ulja i masti br 1.

Prikupljene onečišćene otpadne vode sa platoa interne benzinske pumpe i pripadajućih manipulativnih površina se odvođe na tretman u separator ulja i masti br 2. Nakon prečišćavanja, iste se putem

izgrađene kanalizacione mreže sa slivnim rešetkama zajedno sa oborinskim onečišćenim otpadnim vodama sa ostalih radnih i parking površina odvede na tretman u separator br 1.

Ovako tretirane vode ispuštaju se, preko okna za monitoring, u kolektor oborinske kanalizacije. Krajnji ispusit prečišćenih voda je u rijeku Bosnu.

Čišćenje i pražnjenje separatora te zbrinjavanje taloga iz istog se vrši od strane «DELTA PETROL» d.o.o. Kakanj prema posebnom Ugovoru (prilog: radni zapisnik o čišćenju separatora od 27.03.2025. godine i 29.01.2026. godine).

Na osnovu dostavljene dokumentacije i uviđaja izvršenog na predmetnoj lokaciji, a u svrhu smanjenja negativnih uticaja predmetnog kompleksa i aktivnosti na stanje voda i vodni režim, podnosiocu zahtjeva su ovom vodnom dozvolom u tački 2. dispozitiva Rješenja propisani uslovi kojih se dužan pridržavati prilikom korištenja predmetnog objekta u skladu sa odredbama člana 53. i 116. Zakona o vodama, člana 12. i 13. Pravilnika o sadržaju, obliku, uslovima, načinu izdavanja i čuvanja vodnih akata i odredbama člana 3. tačka cc) Uredbe o uslovima ispuštanja otpadnih voda u okoliš i sisteme javne kanalizacije.

Tačka 3. dispozitiva rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada («Službene novine Federacije BiH», broj 92/07, 46/09, 79/11 i 88/12) i Odlukom o visini posebnih vodnih naknada («Službene novine Federacije BiH», broj 46/07).

U skladu sa članom 61. Zakona o vodama i odredbama Pravilnika o postupcima i mjerama u slučajevima akcidenta na vodama i obalnom vodnom zemljištu («Službene novine Federacije BiH», broj 71/09 i 102/18) korisniku predmetnog pogona utvrđene su obaveze u tački 5. dispozitiva ovog Rješenja.

Na osnovu provedenog postupka konstatuje se da je podnosilac zahtjeva, «ALBA ZENICA» d.o.o. Zenica ispunio minimum uslova za izdavanje vodne dozvole za ispuštanje tehnoloških i oborinskih onečišćenih otpadnih voda u prirodni recipijent sa lokaliteta kompleksa Uprave sa pretovarnom stanicom i pratećim objektima (interna benzinska pumpa, plato za pranje vozila za transport otpada, radionica za održavanje vozila i sl) u naselju Raspotočje, grad Zenica, te je riješeno kao u dispozitivu ovog Rješenja.

Podnosilac zahtjeva je uplatio upravnu taksu u iznosu od 70 KM u skladu sa Zakonom o izmjenama i dopunama zakona o federalnim upravnim taksama i tarifi federalnih upravnih taksi («Službene novine Federacije BiH», broj 06/98, 8/00, 45/10 i 43/13).

Uputa o pravnom lijeku:

Protiv ovog Rješenja može se uložiti žalba Federalnom ministarstvu poljoprivrede, vodoprivrede i šumarstva u roku od petnaest dana od dana prijema Rješenja.

Žalba se predaje ovom organu neposredno ili preporučeno poštom. Žalba se taksira sa 15 KM administrativne takse prema tarifnom broju 3. Tarife federalnih administrativnih taksi.

Obrađivač akta:

Nermina Hodžić, dipl.inž.građ.

Po ovlaštenju
Rukovodilac sektora za izdavanje vodnih akata


Nihad Pezo, dipl.inž.građ.



Dostaviti:

- «ALBA ZENICA» d.o.o. Zenica
ul Sarajevska bb, 72000 Zenica
- Ⓞ AVP Sava, ISV-vodna knjiga
- Sektor 50
- Sektor 40 – arhiva
- Oglasna ploča – AVP Sava